

Telefoni: direktor ++387 32 738 556; Telefax: 730 762, RJ "Pogrebne usluge" - dežurna služba (24h) 735 001
RJ "Tvornica pogrebne opreme" 730 570, 730 571, RJ "Gradsko zelenilo" 735 001, RJ "Klesarija" 735 001, NTS 080 020 110
www.gradskagroblja.ba / www.gradskagroblja.co.ba / e-mail: jkpgg@bih.net.ba
Adresa: Ul. Mule Hodžića br. 108, 71300 Visoko, Bosna i Hercegovina
Upis u sudski registar U/I-2421/05, Identifikacijski broj PDV-a: 218019840000

Bosna i Hercegovina
Federacija Bosne i Hercegovine
Zeničko-dobojski kanton
OPĆINA VISOKO
Ul. Alije Izetbegovića broj 12A
71300 VISOKO
n/r Općinska načelnica gđa. Babić Amra

Visoko, 21.03.2013. godine

Znak: M/N Broj: 200-877/13

Predmet: Očitovanje

Poštovana,

u otvorenom roku, a povodom Vašeg Zahtjeva broj: 01/2-02-320/13 od 19.03.2013. godine za očitovanje Nadzornog odbora u vezi sa dopisom Federalnog pravobraniteljstva broj: I-2393/12 od 11.04.2013. godine (??? - april 2013.), a vezano za način "realizacije" sudske presude na temelju koje je Javno komunalno preduzeće "Gradska groblja" d.o.o. Visoko dužno platiti Federaciji BiH iznos od 1.202.148,69 KM sa zakonskom zateznom kamatom počev od 27.03.2009. godine, prije samog očitovanja smatramo nužnim decidno Vas informirati o ovom sudskom predmetu.

Prije svega, radi se o još uvijek neokončanom predmetu, obzirom da je JKP "Gradska groblja" d.o.o. Visoko, ovim povodom, podnijelo Apelaciju Ustavnom sudu BiH i ista je zavedena pod brojem AP-600/13 (objedinjeno sa AP-771/10).

Podrazumijeva se da odluka Ustavnog suda BiH može u cijelosti izmijeniti trenutačnu situaciju, što se od ove Apelacije opravdano i očekuje, obzirom da JKP "Gradska groblja" d.o.o. Visoko i dalje ističe stajalište da mu je u ovom NAKNADNOM sudskom postupku, prije svega, povrijeđeno pravo na pravično suđenje.

Naime, ničim nije osporeno da je JKP "Gradska groblja" d.o.o. Visoko vršilo smještaj i čuvanje exhumiranih neidentificiranih žrtava genocida sa područja općine Srebrenica čije je iskopavanje i expertizu vršio Međunarodni krivični sud za bivšu Jugoslaviju.

Obzirom da je Federacija BiH tek u 2002. godini legislativnim putem uredila pitanje naknade troškova u postupku exhumacija masovnih i pojedinačnih grobnica žrtava rata 1992-1995, a da je u prethodnom periodu ovo Preduzeće imalo enormno visoke troškove u pogledu smještaja i čuvanja exhumiranih tijela, nadležnom Federalnom ministarstvu pravde je ispostavljen račun za nastale troškove, a koji isto nije htjelo prihvatiti ističući da nije aktivno legitimirano u konkretnom slučaju.

Nakon podnošenja tužbe nadležnom sudu i otpočinjanja prvostupanjskog postupka, nakon, po našem mišljenju, ključnog svjedočenja gospodina Amora Mašovića, predsjedavajućeg-dopredsjedavajućeg tadašnje Federalne komisije za nestale osobe, koji je i sam pred nadležnim sudom nedvojbeno potvrdio osnovanost tužbenog zahtjeva i obavezu organa Federacije BiH da na adekvatan način snose troškove smještaja i čuvanja exhumiranih osoba, nakon okončanja prvostupanjskog i drugostupanjskog postupka po žalbi tužene (Federacija BiH), ovaj sudski spor je okončan presudom u korist JKP "Gradska groblja" d.o.o. Visoko.

Protekom izvjesnog vremenskog perioda, Federacija BiH podnoseći tužbu i ističući tužbeni zahtjev, koji obrazlaže kao slučaj **neosnovanog bogaćenja**, pravi presedan primarno po definiciji tužbenog zahtjeva, obzirom da sudsku presudu (naprijed opisanu) oglašava kao oblik neosnovanog bogaćenja.

Međutim, teže od ovoga je svakako to što je sud uopće i prihvatio na ovaj način koncipiran tužbeni zahtjev, te se može pretpostaviti da sudstvo u ovom slučaju zaista nije bilo nezavisno, ali se ovom prilikom ustežemo od bilo kakvih daljih kvalifikacija, **obzirom da je, kako smo to na početku i istakli, u vezi sa ovim predmetom upućena Apelacija Ustavnom sudu BiH.**

Iz sadržaja presudâ se može ustanoviti da i prvostupanjski i drugostupanjski sud, **u naknadnom postupku**, nisu uvažili niti jedan od prigovora procesno-pravne i materijalno-pravne prirode, čak je JKP "Gradska groblja" d.o.o. Visoko **onemogućeno** i u izvođenju predloženih dokaza, saslušanja svjedoka itd.

Tim povodom navodimo kraću retrospektivu predmeta **od njegovog samog početka:**

JKP "Gradska groblja" d.o.o. Visoko je podnijelo Općinskom sudu u Sarajevu prijedlog za izvršenje na osnovu **vjerodostojne** isprave broj: VT-6-AH/02 od 10.09.2002. godine, protiv dužnika: Federacija Bosne i Hercegovine - Federalno ministarstvo pravde, radi duga u iznosu od 649.162,81 KM, kao dijela duga po računu broj: 19-252/2000 od 12.05.2000. godine za usluge smještaja obduciranih tijela od strane Haškog tribunala ICTY na Patologiji povjeritelja, sa upotrebom hladnjače i pratećeg materijala.

Federalno pravobraniteljstvo je uputilo Općinskom sudu u Sarajevu **prigovor** na navedeni prijedlog, te je Općinski sud u Sarajevu Rješenjem broj: IP: 3898/02 od 25.10.2002. godine **usvojio prigovor** dužnika, Rješenje o izvršenju broj: IP: 3898/02 od 16.09.2002. godine **stavio van snage, ukinuo sve provedene radnje, te uputio predmet parničnom odjeljenju suda**, kao mjesno i stvarno nadležnom za dalji postupak.

Nakon provedenog postupka, Općinski sud u Sarajevu je donio Presudu broj: Ps-397/03-I od 29.10.2004. godine **kojom je Sud obavezao Tuženog (FBiH) da Tužitelju (JKP "Gradska groblja" d.o.o. Visoko), na ime duga plati iznos od 649.162,81 KM po računu broj: 19-252/2000 od 12.05.2000. godine, sa zakonskim zateznim kamatama, počev od 21.05.2000. godine do isplate, kao i da mu naknadi troškove parničnog postupka.**

Protiv ove Presude Tuženi je izjavio žalbu sa prijedlogom da se žalba uvaži i pobijana presuda ukine ili preinači, a Kantonalni sud u Sarajevu, rješavajući po žalbi, donosi Presudu broj PŽ-302/04 od 15.03.2005. godine, **kojom je žalbu Tuženog uvažio, prvostupanjsku presudu preinačio** tako što je Tužitelja u cijelosti odbio sa tužbenim zahtjevom.

Tužitelj je blagovremeno **izjavio Reviziju** protiv Presude Kantonalnog suda broj: PŽ-302/04 od 15.03.2005. godine, pobijajući drugostupanjsku presudu zbog povrede odredbi parničnog postupka i pogrešne primjene materijalnog prava, **smatrajući da je prvostupanjski sud donio pravilnu i na zakonu zasnovanu odluku**, kada je obavezao Tuženog na plaćanje predmetnog duga.

Ispitujući pobijanu presudu, **Vrhovni sud Federacije BiH je Rješenjem broj: Rev-713/05 od 28.03.2006. godine uvažio reviziju, drugostupanjsku presudu ukinuo i predmet vratio drugostupanjskom sudu na ponovno suđenje.**

Imajući u vidu **upute Vrhovnog suda Federacije BiH**, nadležni Kantonalni sud je ponovo ispitao pobijanu prvostupanjsku Presudu u granicama razloga iz žalbe i Presudom broj: 009-0-PŽ-06-000344 od 01.09.2006. godine, **žalbu Tuženog odbio i prvostupanjsku presudu potvrdio.**

Na ovu presudu Kantonalnog suda u Sarajevu Tuženi (FBiH) **je izjavio reviziju.**

Vrhovni sud Federacije BiH **je istu uvažio, ukinuo drugostupanjsku presudu i predmet vratio drugostupanjskom sudu na ponovno razmatranje.**

Rješavajući predmet, Kantonalni sud u Sarajevu je donio "Rješenje" broj: 000-0-Pž-000214 od 18.02.2009. godine, kojim je **uvažio žalbu** Tuženog i prvostupanjsku Presudu broj Ps-397/03 od 29.10.2004. godine **preinačio** tako što je Tužitelja (JKP "Gradska groblja" d.o.o. Visoko) **odbio** sa tužbenim zahtjevom.

Na navedeno Rješenje Tužitelj je 24.03.2009. godine **uložio Reviziju** broj: 160-1113/09, osporavajući **preinačenu Presudu** zbog povrede odredaba parničnog postupka, te zbog pogrešne primjene materijalnog prava.

Vrhovni sud FBiH je donio Presudu broj: 070-0-Rev-07-000611-23/09 od 18.11.2009. godine **kojom je odbio reviziju Tužitelja**.

JKP "Gradska groblja" d.o.o. Visoko je tim povodom podnijelo Ustavnom sudu BiH Apelaciju, smatrajući da je navedenim sudskim odlukama **povrijeđeno pravo na pravično suđenje**, a shodno članu II/3 (e) Ustava i Protokola 1. uz Evropsku konvenciju o zaštiti ljudskih prava i osnovnih sloboda, te prava na imovinu zagarantiranu članom II 3(k) Ustava BiH.

Kako smo na početku i istakli, **predmet je u postupku pred Ustavnim sudom BiH i vodi se pod brojem AP-771/10 (sa dopunom AP-600/13)**.

Osim navedene Apelacije, JKP "Gradska groblja" d.o.o. Visoko je, također, i Kantonalnom sudu u Zenici podnijelo zahtjev za ponavljanje postupka od 11.01.2013. godine, te je i ovaj postupak po zahtjevu u toku.

Sve naprijed navedeno je, primarno, imalo za cilj obrazložiti **neutemeljenost za bilo kakvo bogaćenje, a sam termin "neosnovano" smatramo i neprimjerenim, prvenstveno iz razloga što se nikada, niti jednog momenta nije osporavalo da se u tom periodu (14.11.1998.-21.04.2000.), na smještaju i čuvanju u JKP "Gradska groblja" d.o.o. Visoko, samo za slučaj ICTY-a (Haškog tribunala), nalazilo tačno 2705 exhimiranih neidentificiranih žrtava genocida sa područja općine Srebrenica. Također, nikada nije osporavano da je ovo Preduzeće imalo i enormno visoke troškove da adekvatno pripremi prostorije i opremu za ove namjene.**


Tim povodom je, sa danom dostave ovog akta na Vašu adresu, podnesena i kaznena prijava protiv Federalnog pravobraniteljstva kao pravne osobe, sa zahtjevom za utvrđivanjem individualne odgovornosti, obzirom da, kako smo to naprijed i izrekli, neosnovano bogaćenje jeste eventualno plaćanje za one usluge koje nikada nisu urađene odnosno izvršene, a u toku cijelog postupka nikada nije osporeno da je JKP "Gradska groblja" d.o.o. Visoko fakturirane usluge pružilo u cijelosti.

Na kraju, a što je protekli vremenski interval manje-više i potvrdio, **svi su bili spremni demonstrirati "svoju bol za žrtvama" (misleći naravno na institucije vlasti), ali s druge strane nisu bili spremni prihvatiti svoje obaveze koje su imale prema tim žrtvama, obzirom da su, s pravom možemo reći, ova tijela samo u Visokom (tačnije JKP "Gradska groblja" d.o.o. Visoko) bila smještena i čuvana na dostojan način, u prostorima i sa opremom namjenski nabavljenom i instaliranom za te namjene, a ne po barakama, starim magacinima, tunelima i sličnim mjestima.**


Smatramo da smo ovim dopisom u cijelosti postupili prema Vašem traženju, te se očitovali po dopisu Federalnog pravobraniteljstva, istovremeno se nadajući **da će okončanje postupka pred Ustavnim sudom BiH konačno staviti tačku na ovaj dugotrajni sudski proces.**

S poštovanjem !

Za JKP "Gradska groblja" d.o.o. Visoko


Hodžić Asmir, direktor




Mr. Mehmed Alibegović, predsjednik NO